

# AL-QUR'ĀN AL-KARĪM PUSAT KEBUDAYAAN DUNIA

## Corak Tafsir-tafsir *al-Qur'ān*

### dan Alirannya.

Adapun tafsir yang mustahak benar dipelajari oleh seseorang yang hendak mempelajari hukum-hukum *al-Qur'ān*, ialah:

1. *Ahkām al-Qur'ān*, susunan al-Shafie, yang dikumpulkan oleh al-Baihaqi.
2. *Ahkām al-Qur'ān*, susunan Ibn al-'Arabī.
3. *Jāmi' Ahkām al-Qur'ān*, susunan al-Qurtubi.
4. *Ahkām al-Qur'ān*, susunan al-Jāṣaṣ.
5. *Nīl al-Marām*, susunan Ṣidīq Hasan Khan.

Bagi mereka yang ingin mengetahui kupasan mengenai ayat-ayat yang menjadi pokok ilmu bintang dan falak, amatlah eloknya dipelajari kitab "*Sarāiru al-Qur'ān*," susunan al-Ghāzi Ahmad Mukhtar Bashā (1251-1315 hijrah, 1835-1898).

Di antara tafsir-tafsir yang disusun dalam kurun kemunduran pengetahuan, ialah: "*Tafsīr al-Jalālayn*," yang disusun oleh Jalal al-Dīn al-Maḥālī dan Jalāl al-Dīn al-Sayūfī.

Inilah tafsir yang diberi perhatian besar oleh penuntut-penuntut tafsir pada masa yang akhir ini. Kerana itu, banyaklah ahli pengetahuan berusaha mensyarahkan dan menghashiyahkannya (menghuraikannya dengan lanjut P.), seperti: al-Ṣāwī dan al-Jamal. Oleh kerana pensyarah dan Penghashiyah itu dipengaruhi taklid, maka kita tidak mendapati di dalamnya kupasan-kupasan yang berdasarkan ilmu,

sebagaimana kita dapati dalam kitab-kitab mutaqaḍimin. Demikian juga di antara tafsir yang berkembang dalam masyarakat, ialah: "al-Sirāj al-Munīr", susunan Muhammad Ahmad al-Sharbini, dan "al-Fawātiḥ al-Ilāhiyah", susunan al-Nakhju'anī, dan "Ruḥ al-Bayān", susunan Ismail Haqqi. Ahli-ahli tafsir ini, dalam perkara "riwayat" berpedoman kepada tafsir Ibn Jārīr al-Ṭabarī, dan dalam perkara "balaghah" berpedoman kepada tafsir "al-Kashāf".

Apabila kita perhatikan tafsir-tafsir yang telah tersiar dalam masyarakat, kita dapati penyusun-penyusunnya menghadapkan tafsirnya kepada berbagai-bagai jurusan.

Pertama- mereka tafsirkan *al-Qur'ān*, dengan "riwayat" dan "athar" yang dipandang munasabah bagi ayat, baik riwayat (hadis) itu *marfu'*, *mawquf*, *maqtu'*, atau hanya berita-berita yang diterima dari orang-orang yang Yahudi (dongeng Israeiliyat). Tafsir yang semacam ini, dinamai: tafsir dengan riwayat.

Di dalam kita menghadapi tafsir ini, mustahak sekali kita berhati-hati dan memeriksa riwayat-riwayat itu. Pokok pegangan dalam menyelidiki akan riwayat-riwayat tersebut, ialah: kitab-kitab hadis dan tawarikh, dan mustahak pula ditimbang dengan hukum akal. Sesuatu yang berlawanan dengan yang demikian ini, hendaklah kita tolak, riwayat-riwayat yang sah dari Nabi mengenai tafsir ayat dapat dipelajari di dalam kitab "*al-Itqān*" karangan al-Sayūfī.

Kedua- Golongan yang mentakwilkan "ayat-ayat sifat-sifat dan asma" apabila tidak sesuai dengan dasar "*Tanzīl*" (tujuan *al-Qur'ān*, itu diturunkan) dan

“*taqdis*” (mensucikan Tuhan ‘*azza wajalla* dari sifat-sifat kekurangan). Mereka memalingkan dari zahirnya. al-Imam al-Razi, dalam tafsirnya, mengutamakan hal ini.

Ketiga- Golongan yang mengutamakan tafsir ayat-ayat *tashrī’* (hukum syarak) dan mengistibatkan (mengeluarkan) daripadanya hukum fiqh, serta mentarjihkan (menimbang kemudian mengutamakan) sebahagian ijtihad di atas sebahagian bilangan. Di antara tafsir yang mengambil berat mentafsirkan ayat-ayat yang mengandungi hukum syarak, ialah: Tafsir al-Qurtubi (*Jāmi’ Ahkām al-Qur’ān*), Abu al-Bakr ibn al-‘Arabi (*Ahkām al-Qur’ān*), Abu al-Bakr al-Jaṣāṣ (*Ahkām al-Qur’ān*) dan Sidiq Hasan Khan (*Fath al-Bayān*).

Keempat- Golongan yang menghuraikan nahu *al-Qur’ān* loghatnya dan mereka menurunkan syair bagi menguatkan loghat *al-Qur’ān*. Inilah mazhab ahli Nahu dan Loghat, seperti al- Zujāj, al-Wāhidī, Abū Ḥayyān dala tafsirnya “ al-Bahr” dan “ al-Nahr”.

Kelima- Golongan yang memperkatakan keindahan susunan *al-Qur’ān* dan ketinggian balaghahnya. Jurusan ini ditempuh oleh al- Zamakhsharī dalam tafsirnya – al-Kashāf. Kemudian diikuti oeh al- Baydāwī.

Keenam- Golongan yang menerangkan riwayat-riwayat *al-Qur’ān* dan qira’atnya yang diterima oleh ahli-ahli qira’ah (bacaan) yang kepercayaan.

Ketujuh- Golongan yang menuju kepada pengajaran (mawā’iz) dan peristiwa-peristiwa yang menarik hati. Mereka ini memasukkan ke dalam tafsirnya hikayat-hikayat ahli-ahli Sufi. Dengan demikian, kerap kali mereka keluar dari batas.

Kelapan- Golongan yang hanya mencari dan mengumpulkan unik rupa kisah. Mereka menambah kisah-kisah

*al-Qur’ān* dengan kisah-kisah yang mereka ambil dari kitab-kitab sejarah dan Israiliyat dengan tidak menyelidiki benar tidaknya, seperti: kitab tafsir: “*al-Khāzin*” .

Kesembilan- Golongan yang mengutamakan soal isyarat-isyarat *al-Qur’ān* yang berkait dengan ilmu suluk (*Sūlūk*) dan Tasawwuf, seperti tafsir *al-Tastarī’*, susunan Abū Muhammad Sahl ibn ‘Abdullah al-Tastarī. Kerap kali juga masuk ke dalam tafsir yang semacam ini, perkara-perkara yang berasal dari kaum Baṭīniyah.

Kesepuluh- Golongan yang hanya memperkatakan lafaz-lafaz yang gharib (ganjil) dari *al-Qur’ān*. Menurut pandangan mereka dalam *al-Qur’ān* ada tujuh ratus lafaz gharib. Semuanya itu telah dikumpul oleh al-Sayuṭī dalam *al-Itqān*.

Mengenai perkara in, kami syorkan supaya mengutamakan kitab “Mu’jam Gharīb al-Quran” yang telah disusun setelah memetik isinya dari kitab Ṣaḥīḥ al-Bukhārī oleh al- ustadh Muhammad Fuad Abd al-Bāqī.

Kesebelas-Golongan yang mengutamakan pada membela mazhab yang dipegang oleh mereka. Zamakhshari, kerap kali menguatkan faham muktazilah dan mencari-cari jalan bagi menguatkannya. Fakhr al-Rāzī, kita dapati mempertahankan mazhab al-Shafie dan mencari-cari jalan membenarkannya. Al-Nasafi, kita dapati sentiasa membela mazhab Hanafi , walaupun keterangan orang lain lebih kuat. Tafsir al-Nīsābūrī, kita dapati penuh dengan benih-benih Baṭniyah, terlalu menta’wilkan ayat, walaupun di dalamnya ada bacaan-bacaan yang berharga.

(Dari buah Qalam Tengku Muhammad Hasbi al-Ṣidiqi

- P.Q)